
LO REIS D'ARAGON.

7225.

LO REIS D'ARAGON, aquel que trobet, si ac nom Amfos; e fo lo premiers reis que fo en Aragon, fils d'en Raimon Berren-
gier que fo coms de Barsalona, que conques lo regisme d'Aragon
e'l tolc à Sarrazins. Et anet se coronar à Roma; e quant s'en
venia el mori en Poimon al bore Sainz Dalmas. E sos fils fo faiz
reis, Amfos, que fo paire del rei Peire, loqual fo paire del rei Jacme.

2701, 7225-6.

PER mantas guizas m'es datz
Gauz e deport e solatz;
Que per vergiers e per pratz,
E per foillas e per flors,
E pel temps qu'es refrescatz
Aug alegrar cantadors.
Mas al mieu cant neus ni glatz
No m not, ni m'ajud' estatz,
Ni res fors dieus et amors.

E pero ges no m desplatz
Lo bel temps ni la clardatz;
Ni'l dous cant qu'es pels plaissatz
Dels auzels, ni la verdors;
Qu'aissi m soi ab joi lassatz
Ab una de las meillors.
En leis es sens e beutatz,
Per que li do tot quan fatz,
E jois e pretz et honors.

En trop ricas voluntatz
S'es mos cors ab joi mesclatz :
Mas no sai si s'es foudatz ,
O ardimens o paors ,
O gran sens amezuratz ,
O si es astre d'amors ;
Qu'anc de l' hora que fui natz
Mais no m destreis amistatz ,
Ni m senti mal ni dolors.

Tan mi destreing sa beutatz ,
Sa proez' e sa bontatz ,
Que n'am mais souffrir en patz
Penas e dans e dolors ,
Que d' altra jauzen amatz
Grans befaitz e gran socors.
Sieus son plevitz e juratz ,
E serai ades seil platz ,
Denan totz autres seingnors.

Quan mi membra del comiatz
Que pris de lieis totz forsatz ,
Alegres soi et iratz ;
Qu'ab sospirs mesclatz de plors
Me dis : bels amics , tornatz
Per merce vas me de cors.
Per qu'ieu tornarai viatz
Vas lieis , quar autr'embaissatz
No m'es delietz ni sabors.
